

# 集句大乘有漏修道——勝解、迴向、隨喜

蕭金松

修大乘修道可得六種勝利：(1)起上諸道心得自在名遍息滅，(2)由摧慢故恭敬善知識等一切眾生，(3)由不隨煩惱轉故勝伏貪等諸煩惱，(4)他諸怨敵不能損害，(5)自力能辦大菩提果，(6)修道位菩薩隨所住處皆成可供養處。

依大乘修道位，立有漏修道與無漏修道二種，此稱有漏者，是就有分別漏而立，非所治品之有漏。有漏修道有三：勝解、迴向、隨喜，皆依思擇力成就故，加作意之名。

信解佛母（般若波羅蜜多）為三利之根本，即大乘勝解作意修道之相。依自利，俱利及利他，及各分下下等九品，合為二十七種。菩薩於教道果三種般若波羅蜜多修勝解時，佛以讚美、承事、稱揚等三類九品，如其次第後轉勝，令發歡喜。

能轉自他隨一善根令成大菩提支分之有分別大乘隨現觀，即大乘迴向作意修道之相。此迴向有十二種：(1)菩薩緣自他福業事諸善根，現前發起最勝妙隨喜心，復以如是隨喜俱行諸福業事，願與有情同共引發所求無上正等菩提，名殊勝之迴向。(2)菩薩緣如是事，起如是行相隨喜迴向心，實無如是所緣可得，如彼菩薩所取之相，是於所隨喜功德善根如戒等蘊不生執著，名無所得行相之迴向。(3)如所緣事實無所有，菩提及心亦復如是，於迴向心及所迴向無上菩提亦不執著，由無執著不墮顛倒。名不顛倒相之迴向。(4)於迴向者破除實執，若菩薩摩訶薩於能隨喜迴向之法，起能隨喜迴向法想，於所隨喜迴向之法，起所隨喜迴向法想，而起隨喜迴向無上正等菩提，是菩薩摩訶薩所起隨喜迴向之心，則便墮於想心見倒，所起隨喜迴向皆邪，菩薩應知方便遠離，名遠離之迴向。(5)普於過去未來現在諸佛世尊從初發心乃至證得所求無上正等菩提，展轉乃至入無餘依般涅槃界，如是乃至正法滅已，於其中間所有諸佛波羅蜜多相應善根破執實好惡，名隨念佛善根體性之迴向。(6)於六度善法破執實好惡，名有善巧方便之迴向。菩薩欲學如是方便善巧，應於般若波羅蜜多數數聽聞受持讀誦，令善通利如理思惟，勤請問師甚深義趣。(7)於隨喜心及所隨喜功德善根不生執著，於迴向心及所迴向無上菩提亦不執著，由不執著不墮顛倒，遠離一切虛妄分別，破執實三輪，名為無相迴向。(8)如諸佛無障佛眼通達遍知功德善根，有如是性，有如是相，有如是法而可隨喜迴向，我今亦應如是隨喜迴向，若作如是隨喜迴向則不謗佛，諸佛世尊同所隨喜，名諸佛隨喜迴向。(9)如佛戒蘊、定蘊、慧蘊、解脫蘊、解脫智見蘊及諸餘法，自性空故，無所有故，不墮三界，非三世攝，若法不生則無所有，不可以彼無所有法隨喜迴向，名不繫三界迴向。(10)依出生廣大福德為性，分下、中、上三品。其中，依於假使三千大千世界一一眾生修十善業道乃至五神通，如是諸多福行，而此菩薩發最勝心迴向法界者勝前福蘊，名下品生大福德迴向。(11)相對於三千大千世界眾生，一一皆得預流果乃至緣覺果所獲福德甚多，而此菩薩所起無倒隨喜迴向更勝於前，名中品生大福德迴

向。(12)相對於十方恆河沙數三千大千世界有情，皆發無上正等覺心，是諸菩薩各住恆河沙數大劫，以有所得而為方便，受行般若及餘善根，而此菩薩為甚深般若波羅蜜多方便善巧所攝受故，以無所得為方便隨喜迴向勝前福德，名上品生大福德迴向。

於自他隨一善根而修歡喜之有分別大乘隨現觀，即大乘隨喜作意修道之相。修道位菩薩之隨喜，由名言中所得之方便與勝義中無所得之智慧二所攝持，深修隨喜相應之淨信，於自他作用獲得平等。

